

**SOALAN NO. 39****PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YANG BERHORMAT TUAN OSCAR LING CHAI  
YEW [SIBU]**

**TARIKH : 26 JULAI 2017**

**SOALAN :**

**YB Tuan Oscar Ling Chai Yew [Sibu]** minta **PERDANA MENTERI** menyatakan berapakah persatuan-persatuan yang telah berjaya memohon menjadi penolong pendaftar pemilih di Malaysia dan senaraikan mengikut negeri. Apakah status permohonan Persatuan Persaudaraan Zon Tengah Sarawak. Adakah ahli Parlimen boleh memohon menjadi penolong pendaftar pemilih.

**JAWAPAN: YB DATO' SRI AZALINA BINTI OTHMAN SAID,  
MENTERI DI JABATAN PERDANA MENTERI.**

Tuan Yang di-Pertua,

Untuk makluman Ahli Yang Berhormat, sehingga 30 Jun 2017, Suruhanjaya Pilihan Raya (SPR) telah melantik seramai 252 orang Penolong Pendaftar Pemilih (Wakil Pertubuhan) di seluruh negara dalam usaha untuk membantu SPR bagi melaksanakan urusan pendaftaran pemilih. Walau bagaimanapun, berdasarkan kepada semakan yang telah dibuat sehingga 21 Julai 2017, SPR belum menerima permohonan daripada Persatuan Persaudaraan Zon Tengah Sarawak untuk melantik ahlinya sebagai Penolong Pendaftar Pemilih (Wakil Pertubuhan).

Untuk makluman Ahli Yang Berhormat, syarat kelayakan untuk menjadi Penolong Pendaftar Pemilih adalah seperti berikut:

- (a) Warganegara Malaysia;
- (b) Telah mencapai umur 21 tahun;
- (c) Telah mendaftar sebagai pemilih;
- (d) Boleh membaca, menulis serta fasih bertutur dalam Bahasa Malaysia;

- (e) Tidak pernah disabitkan dengan apa-apa kesalahan di bawah Akta Kesalahan Pilihan Raya 1954; dan
- (f) Tidak pernah dibatalkan pelantikannya sebagai Penolong Pendaftar Pemilih oleh mana-mana Pendaftar Pemilih Negeri kerana melanggar apa-apa syarat pelantikan yang ditentukan oleh SPR.

Sekian, terima kasih.

NO. SOALAN : 40

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YB. DATO' SRI HASAN BIN MALEK  
[ KUALA PILAH ]**

**TARIKH : 26 JULAI 2017**

**SOALAN :**

**YB. Dato' Sri Hasan Bin Malek [ Kuala Pilah ]** minta **MENTERI PELANCONGAN DAN KEBUDAYAAN** menyatakan adakah Kementerian bercadang untuk melaksanakan bersama atau berkongsi kepakaran dengan Kerajaan negara lain seperti Kemboja dalam urusan pemuliharaan tapak warisan dunia di negara kita seperti yang dilaksanakan di Angkor Wat oleh APSARA National Authority. Ini bagi memastikan tapak-tapak sejarah di Malaysia seperti di Lembah Bujang mendapat pengiktirafan dan pemuliharaan yang sewajarnya.

**JAWAPAN :     DATO' SERI MOHAMED NAZRI BIN ABDUL AZIZ**  
**MENTERI PELANCONGAN DAN KEBUDAYAAN**

Tuan Yang di-Pertua,

Buat masa ini, Kementerian Pelancongan dan Kebudayaan melalui Jabatan Warisan Negara (JWN) masih belum mengadakan apa-apa program perkongsian kepakaran yang khusus dengan pihak negara Kemboja. Walau bagaimanapun, JWN tiada halangan untuk berkongsi kepakaran atau pengalaman pada masa-masa yang akan datang.

Namun begitu, JWN sentiasa merujuk serta mendapatkan khidmat nasihat dengan pihak antarabangsa seperti *United Nations Educational, Scientific and Cultural Organization* (UNESCO) dan badan-badan penasihat yang berkaitan seperti *International Centre for the Study of the Preservation and Restoration of Cultural Property* (ICCROM), *International Council on Monuments and Sites* (ICOMOS), *International Union for Conservation of Nature* (IUCN), *World Heritage Center* dan lain-lain lagi bagi mendapat serta mengekalkan pengiktirafan sebagai Warisan Dunia untuk tapak-tapak warisan di Malaysia.

Selain itu, JWN juga telah melaksanakan perkongsian ilmu dan pengalaman berkaitan teknik pemeliharaan dan pemuliharaan warisan dengan pakar-pakar dalam bidang berkaitan dari negara luar termasuk melalui penganjuran *UNESCO Workshop for the Cultural World Heritage Property in the East and Southeast Asia* pada tahun 2005; *Seminar Asia*

*Europe Cultural Minister Meeting (ASEM)* pada tahun 2009; *Seminar Networking of East Asia Cultural Heritage (NEACH)* pada tahun 2009 dan *International Heritage Conservation Seminar (IHCS)* pada tahun lepas. Sementara itu, satu persidangan yang dikenali sebagai *The 1st International Conference on Islamic Architectural Heritage 2017* akan diadakan pada 21 dan 22 Ogos 2017. Perkongsian ilmu sebegini akan dilaksanakan dari semasa ke semasa mengikut keperluan dan peruntukan sedia ada di peringkat Jabatan dan Kementerian.

Sekian, terima kasih.